

抱經堂文集

三



抱經堂文集卷第八

東里  
盧文弨  
紹弓

跋一

十三經注疏正字跋

辛丑

是書八十一卷嘉善浦君鑑所訂仁和沈萩園先生廷

芳覆加審定錄而藏之其子南雷禮部世煒上之四庫

館大興翁覃溪太史

方綱

從館中鈔出一本余獲見之

前有敘錄稱所見有監本有監本脩板有陸氏闡本有

毛氏汲古閣本今惟監本脩板及毛氏本行世故就此

二本之誤正焉其釋文則以徐氏通志堂本校又取宋

玉山毛氏六經正誤之說訂其得失此其大指云爾余

初得日本國人山井氏

鼎

所撰易書詩春秋左傳禮記

孝經論語孟子考文深喜其遵用舊式據古本宋本以正今本之誤然特就本對校而已其誤處相同者雖閒亦獻疑然而漏者正多矣且今本亦有絕勝於舊者不能辨也是書所校正視彼國爲倍多且凡引用他經傳者必據本文以正之雖同一字而有古今之別同一義而有繁省之殊亦備載焉此則令讀者得以參考而已非謂所引必當盡依本文也蓋引用他書有不得不少加增損者或彼處是古字或先儒之義定從某字若一依本文轉使學者讀之不能驟曉則莫若卽用字義之顯然者爲得矣至字音之用反語起於魏晉閒反與翻

音義同故胡身之注資治通鑑卽用翻字今則依說文  
玉篇等書之例普改爲切殆以反作如字讀爲語忌也  
其書微不足者不盡知釋文之本與義疏之本元不相  
同後人欲其畫一多所竄改兩失本真此書亦未能盡  
正也又未得見古本宋本故釋文及義疏有與今之傳  
注不合者往往致疑此則外國本甚了然也又於題篇  
分卷本來舊式多不措意或反有以不誤爲誤者余有  
志欲校諸經已數十年晚乃得見此兩本其善者兼取  
之以成一書而後無遺憾矣 乾隆四十六年元日

甲戌書

郭氏傳家易說跋

辛丑

此宋郭雍子和之所著也其爲說皆平易正大有益於治謂以氣運而言盛必有衰治必有亂然在君子則自有保泰持豐之道故云吉凶之道貞勝者也正則勝而常吉不正則勝而常凶此蓋與君相能造命之說相合其釋損彖云損天下以奉一人則善日消而惡日長迂儒方究多儀備物之享不知損過復禮之義則天下不勝其僞矣又釋豐六五云豐之世盛大无以加又求豐之是无厭也聖人貴夫持盈守成而不以豐大爲務故書有滿招損之戒而易著豐蔀豐沛之失皆篤論也以六十四卦爲文王所重謂以書言之神農之時未有蓋與噬嗑也以道言之神農之時蓋有蓋與噬嗑也又謂

歸妹所歸者妹也非從姊而嫁孔子言天地之大義娣  
媵豈能具此義哉其善於持論多若是此書從永樂大  
典中鈔出分爲十一卷釐然爲完書但繫辭傳說卦傳  
郭氏亦本分章段故有前章此章之語且有與朱子微  
異者而今本缺之漏也庚子臘月余在京師閱起明年  
二月九日在山西訖功因書其後

融堂書解跋

辛丑

此宋淳安布衣錢時子是撰嘉熙中以喬行簡薦得官  
下嚴州取其所著書以進此其一也向來疑書序者以  
書本不待序而明而此書獨推闡入微信非夫子不能  
作至於經文一切無所更改而節次不差脈絡通貫其

說武成康誥足以洗憑臆紛更之謬謂武成自王若曰而下辭無閒隔皆武王之言序所謂識其政事是也康誥之首正是區處商民其頑民已定議遷矣乃始以其餘民封康叔故在康誥之首至其說洪範也謂建極功夫全在敬用五事若次五之建用皇極專爲斂福錫民而設庶徵凡六自五者來備以下明雨暘燠寒風之證自曰王省惟歲以下明時之證語皆一正一反昭然甚明此等議論皆能自抒己見批卻尊竊後學得此蓄疑可頓釋矣唯顧命伯相命士須材疑其不爲喪用又疑側階將近內寢豈執兵之大夫所可立或當立於堂此則猶未審耳喪事所須不可經營於無事之日故舊君

之終卽當預爲新君之地記曰國君卽位而爲椑天子  
寧獨不然古者宮府一體不爲私嫌況奉宣願命之日  
內人無事往來北堂立於側階胡爲不可是書二十卷  
從永樂大典鈔出缺者僅三篇梓材在其中惜乎不知  
其解又云何也 乾隆四十六年閏月二十三日東里

盧某書

呂氏讀詩記跋

丁酉

釋經雜而不貫與隘而鮮通兩者均失之東萊之爲讀  
詩記也一字一句必本其所自而不以自專其意所不  
取而可備一說者亦附注於正解之下以俟夫人之自  
擇焉蓋其織綜之妙合眾說如一說旣不使異說得隔

閱其間而其近是者又未嘗盡棄也斯非釋經之善者乎公劉次章以下雖未及重加整比然固出東萊手所纂輯也東萊所自爲說比眾說下一字條例固云然乃書內有卽繫眾說後稱東萊曰者參差互異余壹從條例正之他不敢妄增損也余初得明神廟時南都版本第二十七卷中脫兩葉陶孝廉衡川湘從嘉靖間舊刻鈔補足之余旣喜是書之詳贍而無偏倚自用之失又惜完本之不多見屬二三友人爲余寫之功未半有以小版本示余者稱爲宋刻余驚喜亟取對校則知神廟間本頗多脫誤小版本字多用分隸體神廟間本易用今字且更有妄爲撰造者然小版本實卽嘉靖間四明

陸欽所校鐫也書中唯一處尙未刊去其名故知之二十七卷中兩葉亦係鈔補則知嘉靖初印本神廟時卽已難得矣使余但據神廟本傳鈔則仍爲未完之本冥冥中有若惜余之徒勤也者而以其善本畀余然則余之受賜誠多矣以鈔者不一手不能盡復其舊余聞取小版本古字畧注一二於旁其沿宋刻之舊歟是未可知也助余校讐者江陰趙茂才敬夫曠明也小版本尙有譌以余所鈔本視之爲更勝矣

王厚齋詩攷跋

庚午

漢賈景伯受詔撰齊魯韓詩與毛詩異同今其書不傳厚齋王氏乃從三家既亡之後區區於羣書所引零章

斷句掇拾而成之其用心可謂勤矣夫三家之學誠不如毛公之精然竝行於當時立博士諸儒傳授各有源流非鑿空妄說比而今皆失墜莫覩其全幸此書所輯得以考十一於千百三家中唯韓詩差詳齊魯則皆寥寥無幾矣惜哉明人有僞作魯申公詩說及端木詩傳者故爲文膚簡脫以示可信時亦有覺其僞者得此書以相參驗其僞乃益明則此書誠學者所當寶貴也余又觀近時人往往見古人所引詩書與今不類者輒以意更之使得見此書亦當瞿然知其不可妄作故余急校而錄之并增其所未備者若干條又所注書名復釐而析之視舊本稍詳正矣然余又欲學者善觀之無徒

取一二字句之異曲爲之說反攻毛氏蓋古人引用偶有異同如同一左傳所載而匪交匪敖與彼交匪敖皆兩有之王氏但載其與今異者耳豈可便據此謂必當作匪交乎又毛詩今所傳亦有譌如朔月辛卯今皆譌爲朔日辛卯矣家伯維宰今皆譌爲家伯冢宰矣此非三家之文乃轉寫致誤而舉世習讀鮮有知其譌者余恐後世反得議此書之漏是以并附著焉

何楷詩經世本古義書後

癸巳

何氏以三百篇之詩分屬世次不與通行本同始於公劉訖於下泉其先後頗難盡信然此亦自成一家之學其書二十八卷配以宿名首角終軫每卷之首各有小

引又有原引爲卷首則當在二十八卷之前又有屬引爲卷後則當在二十八卷之後今此裝潢本於卷首之下將各卷首篇小引抽出來置一處下又即將卷後一冊繫焉以下詩之次第仍同今本以關雎爲首殷武爲末茫然無復卷數大失著書之本意矣其屬引一篇蓋倣序卦而爲之屬以聯屬爲義若知後世必有紛更之者而殿以此篇其序灼然可尋庶幾清亂之餘不難復舊今當於原引之下仍以小引散之各卷之首依角亢氏房等宿名目尋之則二十八卷乃成爲何氏之書而以屬引終焉則與本題卷後之名亦相脗合矣

春秋尊王發微跋

丁酉

夏五之下其爲月也無疑矣而聖人不蓋者謂其文或  
不盡於此也蓋之以月將謂鄭伯使其弟語來盟爲五  
月之事所書僅此無復更疑其上之容有脫文者矣孫  
氏謂孔子專筆削之任舊史有闕必從而刊正之此殆  
後來傳者脫漏耳豈其然哉士匄不伐喪春秋之所善  
也孫氏本穀梁義謂其貪美名以廢君命惡也夫不伐  
喪者周之舊典如是匄能行之何至有廢命之責且見  
可而進知難而退亦軍之善政也受命以出知敵之不  
可勝亦將老師費財不惜千萬人之命以求一逞而俱  
殲焉然後爲不廢命哉苟知其難而全軍以還君子猶  
善之況於不伐喪乎孫氏此書昔人謂其論多苛刻而

在當時則甚重之歐陽氏謂其得春秋本義爲多要之言亦以人重也有得舊本見示者因令學徒鈔之向見通志堂有版本未知視此何如當從友人借以相校始可定耳 乾隆四十二年三月癸未盧某書

張氏治春秋集傳跋

癸丑

張氏爲朱子門人宋史載道學傳所著有春秋集傳二十六卷春秋歷代郡縣地里沿革表二十七卷春秋集註十一卷并綱領一卷今集註并綱領已刻入通志堂經解中而集傳無聞焉秀水朱氏經義考亦疑其已佚蓋學者之不得見久矣今湖州嚴文學久能復得其書喜甚乃元延祐元年所梓雖所缺尚有七卷十八至二十一又二

三至二十  
六皆缺

而其採擇之精立論之確卽於此可得其崖

略其辨胡氏夏時冠周月之說見於集註而傳亦著之  
他若論天子諸侯昏禮不親迎責隱公之不朝聘於王  
朝責文公之昏惰不親會伯主以取晉怒而於齊商人  
弑君之賊不能告天子方伯以致討及其見侵反使命  
卿往而求平焉此皆大義凜然非若孫氏之多刻覈胡  
氏之有牽合也嚴氏其寶守之神物會合或自有時安  
知所缺者之不復再見乎余以塵事紛雜未能卒讀爲  
憾漫識數語於簡末以告四方之學者俾皆畱意訪求  
得完張氏之舊并沿革之已佚者亦再出焉豈不更大  
快矣乎

書春秋繁露目錄後 乙巳

案此書之大旨在乎仁義仁義本乎陰陽陽居大夏而  
陰居大冬見天之任德不任刑也又言除穢不待時如  
天之殺物不待秋則董子之論固非倚於一偏者其重  
政篇云聖人所欲說在於說仁義而理之不然傳於眾  
解觀於眾物說不急之言而以惑後進者君子之所甚  
惡也卽此可知其立言之本意矣我

皇上新考試詞臣取仲舒語以仁安人以義正我命題  
臣竊仰窺

聖德

聖治固已與天地同流與陰陽協撰矣而於是書猶有

取爾況在學者其曷可以不讀向者苦其脫爛乃今而快覩全書尤爲深幸臣服習有年見其以天證人析理斷事實切於養德養身之要而凡出治之原郊祀之典用人之方弭災之術無所不備卽其正名辨制委曲詳盡亦始入學者所必當研究也謹就二三學人覆加考核合資雕版用廣其傳冀無負

朝廷昌明正學嘉惠士林之至意至書中如考功爵國等篇尚有不可強通者在以詒夫好學深思之士或能明其說焉 乾隆五十年十月舊史官臣盧文弨謹書

## 目錄後

惠定宇春秋補注跋

戊子

丙戌之春借得此本課兩兒分鈔不解文義舛謬者半  
兒子師江陰朱與持補略爲正之鈔未竟會有湖南之  
行攜之篋中兩年矣卒卒無暇理此今年至京師長夏  
無事補鈔末卷元本經轉寫亦有誤復爲之一一正定  
書乃完善昔杜元凱嘗謂立德不可及立功立言或可  
庶幾其注左傳誠欲以當不朽之一也豈知紕繆荒略  
之失亦有不能自掩焉者名位赫奕當時或未敢相難  
而後之經生乃得明目張膽掎摭其短長豈非率爾之  
爲累哉公卿大夫各有職業其爲學必不如經生之專  
且勤何事強其所不能以爲名耶雖然元凱居其位尚  
有餘力著書余則因官罷閒居僅能卒業彌不及矣書

之以識吾愧云時戊子五月書

不全宋本左傳跋

甲寅

吳興嚴久能得萃古齋主人錢景開所贈不全宋本左氏傳止四卷以示余第十八卷襄五起二十六年至二十八年第二十二卷昭三起八年至十二年第二十三卷昭四起十三年至十七年第二十四卷昭五起十八年至二十四年觀其避諱至寧宗殆亦南宋本獨昭二十年傳載衛侯賜析朱鉏北宮喜謚杜注云皆死而賜謚及墓田傳終言之王深寧所見本乃未死而賜謚及墓田傳終而言之載於困學紀聞若果如此杜氏不應無譏何義門氏曾見此本獨無末字而字爲閻百詩言

之閣大喜乃余今亦得見之而證何氏之言信不誣日本國亦有此不誤之本參相證而知近本亦尚沿王氏所見之本非善本也速當改正必如是而後杜注所云傳終言之之義始明太平御覽所引傳凡標昭五昭六者乃其卷數非年也至近來所分卷亦非復當日之舊矣會于夷儀之歲一段宋本尚在襄五卷之首二十六年之前杜注云傳爲後年脩成起本當繼前年之末而特跳此者傳寫失之其語甚明近本竟改置前年之末矣宋本之可貴蓋不止一端也是書不用國隔不載音義卷末載經若干字注若干字中間亦有一二字誤皆人所易曉云

書公羊注疏後 己亥

此書雖列十三經中能畱意者絕少蓋公羊氏以經生之見測聖人而聖人幾爲亂名改制之尤今當聖道大明之日固夫人而知其說之謬矣雖然漢治公羊家者有醇儒焉有名臣焉讀一書卽能得一書之益今人見解議論遠過古人而行反不逮何也乾隆戊戌余讀春秋繁露旣已尋其脫簡審其譌文而正之余因思董生頗精公羊家言爲之沿流溯源則是書不可不讀獨恨何氏之識遠不逮江都故其說多苛碎不經之談而疏必爲之依阿其間不敢直斷以爲非是此猶是漢人欲伸師學之見要其繆盪亦不待摘抉而後見也何氏文

筆未善故其言多有晦僕難曉者疏獨能通之其所引春秋說與諸緯書俱已不傳後世亦賴是見其一二廁諸疏中視論語孟子猶當勝也閱起於臘之八日至次年三月十一日始較功云

方望溪鍾蔗經兩先生刪訂周禮訂義書後  
辛丑  
今上登極之初纂脩三禮望溪先生爲總裁選通禮學者爲纂脩大興鍾蔗經先生與焉名畹字勵暇官至禮部儀制司郎中蔗經其晚年自號也此周禮訂義乃宋樂清王與之次點所著其用朱筆點勘者蔗經也用綠筆審正者望溪也別其是非擇所去取蔗經先之望溪成之間亦有異同焉此正脩三禮時所相與衡校之底

本也計凡舊人禮說皆當有望溪點定者卽蔗經所刊脩亦不止此而此一書適爲烏程丁小疋氏所得出以示余皆二公真跡也余不及登望溪之門獨於蔗經遊從最熟及其老而依子宦遊也余一見之於南昌又見之於松江又見之於江寧詒余祭禮考一冊今斯人不可作矣覩其遺墨莊謹不苟恍如見其爲人望溪有評史記真筆在北平黃氏亦用綠色筆與此正同豈以此自識別耶蔗經富於經學著書甚多其子觀察君居憂娶疾今不知何似未知其能爲乃翁表章否也偶繙此書小宰六計弊羣吏之治次點以康成六事廉爲本之說爲不然廉猶廉問廉察也蔗經不刪亦似有取爾者

意竊疑之曰聽曰弊意已足該何必變其文而曰廉問  
其善乎廉問其能乎謂察爲廉經無他比六計具有功  
狀聽之於始弊之於終其人已無可匿何必如後世之  
寄耳目於人使爲刺探而後其眞可得耶記曰大臣法  
小臣廉羣吏則小臣爲多矣而曰廉非所貴乎且廉訪  
之字古亦不作廉古作規惜乎當日不能就蔗經而請正  
之今質之小疋幸有以語我 乾隆四十六年閏月十  
一日後學盧某跋

魏華父儀禮要義跋

甲寅

此書五十卷世罕流傳聚樂堂藝文目有之朱錫鬯載  
之經義考然未之見也烏程嚴文學元照聞杭州汪氏

新得此書猶是宋刻亟以二百六十千轉購之甚寶惜手鈔副本以示索觀者而刻本不輕出也余至其家始得見之此書分段錄賈氏之疏每段先標大指爲提綱以下但載賈疏魏氏絕無論說余時爲儀禮注疏詳校取以覆對其譌舛處與近世本大略相似朱子通解雖有改正而亦未能盡則知此一書之傳譌也久矣今此上方聞著溫本一二異同不多見其經注闕者亦未之補也然每段括其大要使考究者易於尋求則此書亦不可廢以朱氏過目之書廣博爲人所不易及而今乃得見其所未見者可不爲幸歟

書校本儀禮後

丙申

昔吾從兄宇安兵部

宏惠

家居時嘗爲人說儀禮余時

年尚小但聞說牲體長脅短脅與今世所稱無異又謂

宰相必用讀書人茲言良不誣亦因讀儀禮有感而發

也嗣後秀水盛君庸三

世佐

從余師桑弢甫先生於南

屏精舍講此書盛君以所得著爲集傳疏其凝滯約其

旨歸余讀而善之亦遂有志於是以爲禮之節次皆出

於自然苟得其一不難以三隅反也聞於賈氏疏亦嘗

訂正其誤有由於館閣校本之外者然以云融貫則卒

莫能自信今年江都汪君容甫

中

語余曾見宋本儀禮

鄭氏注與今本有異同余因假其傳錄者以歸卽用注

疏本就文改之然宋本鄭氏注實與賈疏先後次第多

不符同當是賈氏未疏之前所傳本不一卽他經亦有之然則此注自當單行余乃就有疏本錄之爲不審也後之讀者其勿以疏而疑宋本注之未是庶幾得之盛君於今本鄭注之誤亦疑之以爲當作某今得本證之良是於此蓋服其精思爲不可及也兵部兄康熙五十五年進士仕至郎中適宗人有爲大司馬者避嫌遂乞歸一子早死其遺書多散失余曩所聞特其淺淺者耳盛君乾隆十三年進士爲令雲南有解銅之役卒於江南儀徵舟次其書之在亡不可知其大略則錫山秦大司寇嘗取之載於五禮通考內矣附著之以見余之所以知讀此書者實由於二君云

於後知容甫所云宋本非真宋本也其鄭注前後移

易乃據元敖繼公集說本耳

甲寅正月記

新刻大戴禮跋

庚辰

吾宗雅雨先生思以經術迪後進於漢唐諸儒說經之書既遴得若干種付剞劂氏以行世猶以大戴者孔門之遺言周元公之舊典多散見於是書自宋元以來諸本日益誘舛駢至不可讀欲加是正以傳諸學者知文弨與休寧戴君震夙嘗畱意是書因索其本并集眾家本參伍以求其是義有疑者常手疏下問往復再四而後定凡二年始竣事蓋其慎也如此余嘗謂此書之極精粹者曾子數篇而已而立事一篇尤學者所當日三

復也博學而孱守之余素服膺斯言自爲棘人每誦君子思其不可復者而先施焉數語輒不禁淚之盈眥也孔子三朝記其文不能閑深疑出漢後人所傳會學者當分別觀之戴君丁丑年所見余本卽元時本耳自後余凡六七讐校始得自信無大謬誤刻成覆閱又得數事今附見於後以此蓋知學問之道無窮心思之用亦無窮庶幾來者亦將有所得乎此也

哀公問五義篇躬爲匹夫而願富

案躬字疑本是窮字

夏小正篇將閒諸則

案閒字疑當作閑字

保傅篇安陵任周瞻而國人獨立注安或爲隱

案隱字疑

當作鴻下  
隱陵君同

曾子立事篇伐則不益補則不改矣

案上注云補謂改也則此不當

云不改蓋當作補則不復矣形近而訛下文云其下復而能改也可知當作復字無疑

曾子本孝篇君子之孝也以正致諫注諫卿大夫

案注

中諫字當作謂字

武王踐阼篇戶之銘曰擾阻以泥之

案此語朱子亦謂不可解竊疑

擾乃穀字之譌服虔注揚雄賦云擾古之善塗鑿者王伯厚校此篇一無阻字則當爲擾以泥之無疑蓋擾亦本作擾形近易譌也

衛將軍文子篇主人間之以成注公西赤聞之以成家語云眾人聞之爲成主或聲誤也

案此不見何字爲聲誤疑自家

語以下後人妄增入

又是卜商之行也注如斯言便能

案當作使能形近而爲

盛德篇蒿宮注木工之鏤示民知節也

案之字當作不字

文王官人篇考其陰陽以觀其誠注陰陽位隱顯也

案此注余初疑位乃謂字因聲誤今案當作猶字形誤耳

夏小正補注書後

辛未

夏商之書傳者無幾學者往往以不克盡見爲憾然卽其零章斷簡求之則古先聖王之大經大法又未嘗不可得而見也戴氏之傳夏小正傳去可謂精矣所辨析聲去可謂精矣所辨析不過字句之間而有以通乎作者之本意夫古人元非若後世之求工於文也然道德有於身則明天時察物理通人事立國制無枉非性命之旨寓焉而文自從之矣濟陽張爾岐櫻若氏採金仁山之注附於傳而又爲

之說今崑圃黃先生復因其本增訂之以傳於世吾觀  
先生之說也於綏多女士見夏道尊命近人而忠焉於  
豺祭獸見夏之先賞後罰先祿後威焉於其終篇再書  
噴麋角而以爲聖人扶陽抑陰之意故於夏不言噴鹿  
角且證之以易姤復之義焉則微獨一代之大經大法  
如公田入學之制可以考見而并其精微之蘊亦如將  
見之豈非讀書之善者哉此書明王廷相楊慎皆有纂  
輯余未之見見先生之說當無以過之矣有一二舛誤  
蓋校者之未審云 乾隆十六年五月八日識

書楊文定公大學中庸講義後

庚辰

公卒之明年余方至京師已不及見公今來公之鄉得

交公之子蒼毓

應詢

登公之堂匪飾匪崇公歷事

三朝宦蹟烜赫而澹泊寧靜不改寒士之素於此亦可見公自少卽深究性理之學李文貞主禮部試時以此發策獨賞公對爲粹然一出於正自此成進士從文貞受業益極意於學此乃公讀大學中庸有所得手疏以質諸文貞者文貞爲點定且評其後曰圓融潔靜枝蔓去而根本呈其師弟之間相契若此此可見當時士大夫相深以學問相漸以義理爲一時盛事惜余生已晚不及見然一朝得見兩大賢遺墨所言又皆聖賢之精義抑亦可謂幸焉公嘗揭經書言學指要示學者其功在敬與義其歸在於盡誠而達天此以中庸知人知天

爲知人之所以爲人與天之所以命人者智以開仁之先明善爲誠身之本公之於學不專守章句而獨得其要領與朱子平日先知後行之言正相脗合而非爲苟異也豈徒詹詹治經生家言者之所能彷彿也哉

孟子注疏校本書後

丙申

趙邠卿注孟子今所傳監本汲古閣本凡與疏相連者多被增損失趙注之舊矣趙氏於每一章後皆有章指作疏者徑削去之仍取其辭置於疏首而又不盡用也獨於章指所用事辭往往於疏內具釋之然則何以知章指爲作疏人所去也其於恥之於人大矣章具著之矣云凡於趙注有所要者雖於文段不錄然於事未嘗

敢棄之而不明是以疏內釋章指之語者不一而足當  
館閣校刻經史時於此書未嘗前後契勘於是見注無  
其文而疏乃爲之具釋者則疑以爲衍文或又以爲他  
書誤入於此或徑刪去之或雖刪而仍錄其疏於考證  
中乃亦有疑今所傳趙注之不全者眾論差互皆不知  
有章指二字之名目也乾隆辛巳余從吳友朱文游與  
處借得毛斧季所臨吳匏菴校本乃始見所爲章指者  
獨於末卷缺如也後見余仲林蕭客所纂五經鉤沈亦  
復如是更後乃間有何仲子校本則所缺者獨完求之  
累歲不獲今江都汪容甫乃始以其錄自何本者借余  
遂得補錄以成完書計今年丙申上距辛巳十六年矣

及老眼猶明得還漢人舊觀豈不大快也哉更有孟子  
篇敘亦出趙氏世知之者蓋鮮余意欲先鈔篇敘與章  
指孤行而注之爲後人增損者亦不可不復其舊誠得好  
古而有力者合而梓之則尤爲善之善已疏非孫宣  
公所撰而假託其名宣公有音義序作疏者卽略改數  
語便以爲正義序此尤爲作僞之明驗昔人譏其疎陋  
不足觀非過論也

附孟子異文 行者有裹纍也 曰伯夷何如趙注無伊  
尹二字今本有之非也 曰然則有同與 自有生民以來未  
有能濟者也 古之爲市也 許子必織布然後衣  
乎 放勳日勞之來之 有攸不惟臣 事在易而

求之難 政不足與閒也 則使人導之出疆

字無君

字

王使人瞞夫子

今作瞞

今之事君者皆曰

此惟疏本有

皆字 無不知愛其親者

夫子之設科也

萬子曰

一鄉皆稱善人焉

句讀之異 惟曰其助上帝寵之

句

有人不得

句

雖由此

句 霸王不異矣

至大至剛以直

句

宜

與

句 夫禮若不相似然

使虞敦匠

句

事嚴

季孫

曰異哉

句 子叔人疑

十一經問對跋

丙申

此元時茂林何異孫所著也黃氏書目云設爲經疑以爲科場對答之用今案何氏自敘其緣起乃因小學訓

導爲學生承問失對而停職故輯爲是書以助蒙訓非爲科場設也元時爲校官者必先試而後授之及至官不得不勉盡其教人之責撰爲講義以時示諸生其弊雖亦文具而已然賢者尙能舉其職不賢者亦知顧其名自今觀之猶令人慨然思古風焉是書固爲教小學設然其所訓亦有折衷儒先擇取精當而不唯以一家之言爲墨守者惡得而廢諸異孫之履行吾未知其詳其云豐城開州治之八月會二教諭於講堂因言及按察責訓導之事考豐城之升爲富州在至元二十三年丙戌也書成而序繫以戊戌則大德二年也異孫蓋嘗爲校官於豐城者書中引王稼村先生講義講莫春浴

沂爲實周之夏五月且云於杭州府學講此一章則稼  
村必是杭之校官而郡志闕焉其名不可考矣志唯載  
何庚孫嘗爲吾杭教授竊疑庚孫必異孫之譌惟其同  
官故知之詳悉如此是又當著之以諗夫脩郡志者是  
書有通志堂梓行本無何序卷有更易而後二卷闕文  
最多今本係從元版鈔得者乃毛子晉藏本紙亦糜敝  
然猶有可據以補通志堂之所闕者其儀禮中有兩條  
本有問而無對余爲足成之此書於三禮祇略舉其郛  
廓不若論語孟子之條析爲詳也

五禮通考跋

癸未

天地間一皆禮之所蟠際乎五禮之用猶夫四時五行

之成歲功也蓋嘗大較分之嘉近於春賓近於夏軍近  
於秋凶近於冬而吉實流貫乎四者之中亦猶夫土之  
寄王於四時焉天高地下萬物散殊人之生也孩提知  
愛少長知敬蓋自三才立而禮卽於是乎肇端有聖人  
作爲之經緯焉踵而成之者未必皆合於節文之中然  
亦緣情而制因義而起苟擇其宜而審行之固亦聖人  
之所許也吾師味經先生因徐氏讀禮通考之例而徧  
考五禮之沿革博取精研凡用功三十八年而書乃成  
文弨受而讀之其書包絡天地括囊人事縷析物情探  
制作之本旨究變遷之得失義未安雖昔賢之論不輕  
徇理苟當卽豪末之善亦必錄窮經者得以息紛紜之

訟處事者得以定畫一之準大矣哉古今之菁英盡萃  
於此矣洵懸諸日月不刊之書也夫昔之有事於綴緝  
者通禮類禮今已不傳馬氏作考但志王禮而士庶則  
略且於古有今無古無今有及本無沿革者皆不之及  
凶禮有五而徐氏但志喪禮蓋規模大則節目益繁精  
力固慮有不逮也先生之書豈非獨冠古今者乎顧說  
者謂士當求合先王之意已耳而不必屑屑於既往之  
迹此大不然孟子當籍去禮壞之後故不得已而爲約  
略記憶之辭孔子之時文武未墜則大小無所不學杞  
宋無徵而夏殷未嘗不能言也上考三代下暨百世所  
因之禮損益可知臚而列之究其變而常道之不可易

者蓋以著以此知聖人之亦必有取於是書也明矣文  
弨懵學竊快覩是書之成敬識數言於簡末云

廣韻跋 戊寅

此本鋟版年月無可考觀其獨避宋孝光寧三帝諱睿  
惇字皆缺筆十九鐸內有廓字無擴字疑在寧理二朝  
時所刊也明時有內庫版行本孫北海春明夢餘錄所  
載凡二百五十五葉今此五卷并敘計之止百八十四  
葉注已經刪整朱錫鬯謂明中涓亦有刪本然此本不  
避明帝諱知非勝國所刊目錄所注獨用同用卷內多  
有異同其分併處亦非本真吳下張氏重刊宋本注比  
此爲完而上平二十一殷作欣去聲四十三映作敬與

此不同殷與敬皆宋所當諱而一避一否此不可曉也  
孫愐作此書本名唐韻祥符重脩始易以廣韻之名而  
鼂公武讀書志卽以廣韻爲孫愐增加陸法言之書豈  
誤記耶抑廣韻卽唐韻本無分別邪明末嘉定陸元輔  
自言於范秋濤處得見唐韻五冊此本如在安得好事  
者求而表章之

張萱彙雅前編書後

癸巳

考明史藝文志此書尚有後編今此特前編耳有吳郡  
趙頤光冢經籍八字印頤光卽宦光字凡夫乃著說文  
長箋者此書有硃墨字皆其筆也末復篆十二字己酉  
三月廿二下春天階館閱書刻於明神廟之三十四年

歲在乙巳己酉卽其後四年耳萱好大言其題辭云余爲字觸計非十年不敢出然一出當令古今字書皆廢凡夫題其上云果可廢則吾書亦廢矣快哉快哉其然豈然案凡夫之爲長箋亦自矜詡而顧寧人頗抉摘其疵謬古人所以有目睫之論也通篇俱有句讀標識則本朝康熙辛酉歲常熟許玉森所加也有數字識卷末弟子武進丁履恆基士校

抱經堂文集卷第八

抱經堂文集卷第九

東里  
盧文弨  
紹弓

跋

二

書吳槎客所藏不全宋本漢書後

汲古所梓漢書當是據北宋本此疑是南宋本誤字亦少汪文盛本殆亦從此本出今世所通行者顏注尚有脫落何論蕭該子京三劉而此獨全可寶也然余則謂設使當世有重雕者其款式自當依此其文字有斷然知其誤者不必因有宋人校語而反改不誤者以使之誤在擇而取之可也如是將使後人寶我

朝之本轉勝於寶宋本多多矣余老矣槎客強力有餘

當亟圖之余亦當疆沒少佐其成焉

竹書紀年統箋跋

辛未

歲辛未余館北平黃崑圃先生家先生門下士知名者眾顧獨詫癸卯主江南試所得三人曰任翼聖啓運陳亦韓祖范徐位山文靖此三人者其學皆博而醇且曰人但侈榜中有狀元孰若得一二不朽之士哉任既宦達名蓋著陳徐亦竝以經學徵陳老不至徐君年亦八十五矣健獨應徵此書迺其近著也一日徐君來先生令余出見先生家多客而獨徐見者此先生待余意不薄也他日至其館猶握三寸管低頭著書不輟云此紀年統箋者徐君所著書之一也紀年舊有沈休文注乃

後人取宋書符瑞志附益之非注也今徐君始與之疏  
通證明疑者得以渙然冰釋然他書引紀年文自晉建  
國以來以晉君始立之年爲元戰國時則以魏君始立  
之年爲元而今本皆一以周王之元爲元疑後人改之  
非其本眞也然各本竝同亦無由復其舊矣史記注中  
又往往以年表爲紀年非此紀年也昔譙周作古史考  
以糾史遷之謬司馬彪條古史考中凡百二十二事爲  
不當多據汲冢紀年之義今余方著史記續考證未竟  
得此書以相參覆庶可無憾矣

題越絕後

辛未

此書爲漢更始建武之際會稽袁康之所作又屬其邑

人吳平定之觀其篇中離合姓名而知也而王仲任論衡案書篇稱會稽吳君高之越紐錄向雄不能過越紐卽越絕君高卽平之字無疑則以是書專屬平所撰矣其首篇乃託之子貢復託之子胥且以小藝之文未足自稱爲言其所載略與吳越春秋同蓋雜採諸書而成故往往有異文駁義如伍胥又以爲申胥逢同又以爲馮同類參錯不一廉行事無所考然由此書以想其爲人蓋其生適當雲集龍闢之時負其奇氣欲有所試而卒不爲人用故無所表見於世乃借胥倪種蠡之事會萃增益之以發抒己意云爾雖其自言欲竊附於春秋而實不離乎短長家之餘習其文奇而不典華而少實

且亦多庸猥煩複蓋其辭又出國策下矣予偶得明張  
佳嗣校槧本後又得吳琯本相參校吳本有脫文張本  
皆就其闕補之至不能補者乃作一方圍子意所脫必  
不止是吳本僅空一字者乃轉寫既久失其所脫字數  
故耳不當僅作一方圍於中也 乾隆十六年五月三

日識

越絕外傳本事第一越絕荆平王內傳第二越絕外  
傳記吳地傳第三今本次第如是然案本事篇以越  
何不第一而卒本吳太伯爲問其末篇又云始於太  
伯次荆平次吳人次計倪次請糴次九術次兵法終  
於陳恆是皆以太伯爲第一案吳地首稱太伯當卽

此篇然今本次在第三其下次序皆不相應豈爲後人所貿亂歟

其最無理者如稱舜用其仇而王天下仇者舜後母也鄙倍至此他如論堯舜不慈孝皆不可訓舜不聞有兄獨此書稱舜兄狂弟傲可以廣異聞云

舜後母下或當改家諱

有弟字但有庳之封在有天下之後與所言亦不合

中興館閣錄續錄跋

丁酉

古人居其官則思舉其職前事之不忘後事之師也余雖忝竊清華而當其時不能多購書若洪氏之詞苑羣書亦解組後所傳錄也今又得此書復校而錄之年六十有一矣玉堂天上余之徘徊慨想情有倍深於

歐公者顧不能成一書以頌颺 本朝  
列聖恩禮之盛常用內疚秀水朱竹垞氏有瀛洲道古  
錄亦未之見此書宜在所取材者也卷或脫亡篇第疑  
亦有顛錯無所取以補正游侶楊万里之名自是本來  
如此他人則有作似作萬者而此二人獨不爾可據之  
以正宋史也

書鈞磯立談後 丁酉

此書南唐國亡後記其興衰之概不知何人著或云是  
史虛白其自序云叟山東人清泰中隨先校書避地江  
表父子皆不以進取爲念書中有云山東有隱君子者  
與韓熙載同時南渡以說于宋齊邱齊邱引以見烈祖

擢爲校書郎不能用其言也於是放意泉石遂卒不仕  
此殆卽其先人歟是書於忠佞功罪之迹可稱實錄徐  
鉉等撰江南錄誣潘佑之死以妖妄叟雖未見其書而  
疑其必有曲筆爲書佑以直諫死使後之人不信其謬  
悠其用意抑何至也序云得百二十許條今計之祇三  
十條然要領已無不盡且相傳止一卷未必本書多於  
此三倍也曹氏刻本多譌脫此本爲何小山所傳較完  
善因傳錄之

夢梁錄跋

丁酉

宋南渡以臨安爲行在所其後乃遂安於是也朝廷之  
儀式與夫里巷之風俗日增月新殆將跨汴京焉是書

爲錢唐吳自牧著當宋社已屋而爲之追述其盛題云  
夢梁意可見矣序無紀元而但書甲戌若在咸淳則故  
都尙無恙也閱一甲子則當在元順帝時斯時元之爲  
元不猶夫宋之季世也哉汴亡而夢華作其地已淪異  
域孟氏特彷彿而得之今茲所紀則皆耳目所素習者  
鐘虀不移井邑如故凡夫可欣可樂之事皆適成可悲  
可涕之端作者於此殆有難乎爲情者焉浙江通志載  
此書十卷者非全本今從蘇州吳伊仲秀才翊鳳處借  
得此書二十卷乃足本令人錄而傳之脫誤尙多惜無  
別本參正云

書歸潛志後丙申

此書記金源人物文雅風流殊不減江以南卽一二諧謔語亦多有可觀讀者皆知愛之余謂京叔際危亂之時國亡之後幸而完歸追述交游聞見以著爲是書脩金史者亦頗取裁於是乃其論一代之盛衰與其所以亡者實爲確當可爲後來之龜鑑其言曰章宗政令脩舉文治爛然稱極盛矣然文學止於辭章不知講明經術爲保國保民之道又頗好浮侈崇建宮闈外戚小人多預政大臣惟知奉承不敢逆其所好故上下皆無維持長世之策此所以啓後嗣之弱也噫金之盛衰相倚之幾此數語者實盡之矣又自言經喪亂後乃識溫飽安逸之味斯言也亦可以醒人人誠能知此則躁擾之

胸可平而奢競之緣亦無不可淡矣真閱歷有得之言哉錄竟因爲識數語於簡末

兩漢刊誤補遺跋

甲午

曩余讀漢書見監本所載宋人校勘語大率淺陋居多甚有鹵莽滅裂不考原委不究體勢於本無可疑者而亦疑之刪改憑臆傳布至今館閣有考證之作駁而正之未盡也余嘗思前人豈無見及此者今得吳斗南兩漢刊誤補遺讀之而不勝躍然喜也吳氏自以後進不欲斥言前輩名公之失而曰補遺不曰糾繆此其用意良厚於劉氏離句之誤則曰或傳錄使然蓋雖辨駁之中而仍不失謙退之意其所徵引鑿鑿皆有據依又可

通於他書蓋不僅史漢之功臣三劉之爭友也惜重校  
經籍刊刻時未及見是書故所載一仍監本之舊而於  
此書未嘗稱引及之世之知此書者絕鮮余乃今見之  
始知後人果不可輕量前輩也所借本多譌字余稍爲  
正之而後錄之儻與我有同好者欲爲傳鈔余不敢斬  
至斗南出處已見秀水朱氏跋中茲不復及云

新唐書糾繆跋

辛卯

此書言新唐書之脩也其失有八誠後代作史者所當  
鑒也中閒糾正書事不實體例不當處固難爲歐宋解  
然亦有率意抨擊絕不細審其前後語意者今略舉數  
條於此如武惠妃謀陷太子瑛張九齡執不可時九齡

已爲相妃故但諷以宰相可常處不云宰相可得也太子之廢在九齡罷相後故云卒九齡相而太子無患正言終九齡在相位日太子尙不廢也吳氏乃誤解卒九齡相如云卒以九齡爲相又誤截太子無患句不復與上文相承遂譏云太子竟廢死安得云無患哉此誤糾者一李栖筠傳有方清阻亂一節吳氏譏云栖筠是時爲常州刺史且無討伐之職而方清自是蘇州土豪依阻夥衆詔自委李光弼討平與栖筠無所干預何爲乃見於其傳乎此當載之光弼傳也案此亦吳氏不細讀下文之過此段乃事之緣起非正敘方清也案栖筠傳詔李光弼分兵討平之下云會平盧行軍司馬許杲恃

功擅畱上元有窺江吳意朝廷以創殘重起兵卽拜栖筠浙西團練觀察使圖之此其所以載栖筠傳也方清之亂帝特使光弼分兵討之許杲卽其所遣之人矣光弼竝不自行何云當載光弼傳乎此誤糾者二又張孝忠子茂宗詔尙義章公主孝忠遣妻入朝爲子親迎卒於京師遺言勾成禮此情事本極明白吳氏乃誤疑亡者爲孝忠前妻其入朝者爲後妻旋又疑亡者未久而孝忠不應卽娶朝廷亦不應以妻待之史官亦不應以妻書之謬悠可笑此誤糾者三亦有因一字筆誤過於辭費者如李泌辭大學士云張說爲之固辭至崔圓亦引說爲讓而止此皆泌之言也引說誤寫引泌吳氏遂

疑其脫字必多全不可考卽明知其誤如蕭嵩代張說  
因與李銳文相涉說字亦誤作銳而吳氏糾之凡三百  
八十餘字不太辭費乎然其論之正者則固未可沒也  
余初借得本其序文首一葉不知何人僞撰後又借得  
完本乃從海虞趙開美校刻本影鈔者序及表皆完全  
末卷柳宗元傳以下六條失其本文復雜取他卷中已  
見者綴其後余故薦之俟他日讀新唐書案吳氏之目  
以尋之或尙可得也 乾隆三十六年七月庚申鬯菴

盧某書

後得吳中舊  
鈔本遂補全

咸淳臨安志跋

丁酉

始余之鈔是書也不得善本求之他氏亦復然更一二

年閒友人鮑以文氏乃以不全宋刊本借余向所闢六  
十五六十六兩卷獨完然具備余得據以鈔入雖尙闕  
第六十四第九十及最末三卷然視曝書亭所鈔則已  
較勝矣宋本前有四圖但字已多漫漶余請友人圖之  
其依俙有字跡而不可辨者余以方圍識其處又校對  
其文字異同始知外閒本刪落甚多顧力不能重寫則  
以字少者添於行中字多者以別紙書之綴於當卷之  
後且注其附麗本在何處庶來者尙可考而復焉噫世  
間之書若此者多矣書賈圖利往往妄有刪削以欺人  
其流傳甚易真本蓋微矣古人以讀書者之藏書爲最  
善其不以此也夫

嘉泰會稽志跋

甲午

會稽志二十卷以陸務觀序考之當時郡大夫與鄉之  
人士共事於斯而始終之者通判施武子宿也務觀亦  
與焉余旣鈔得潛說友咸淳臨安志因并鈔是書爲其  
無別於後來諸志本其書成之年標其目曰嘉泰會稽  
志猶臨安志之稱咸淳也武子嘗注蘇詩高出王龜齡  
之上至今學者重之務觀文筆尤爲南渡宗匠此書詳  
簡得中紀敘典核臨安志尚有詔權姦揚己績之失而  
此無有要非施爲主而佐之以陸不能鑒裁精當若是  
武子嘗知餘姚縣脩捍海隄此當直敘其事使後來者  
可圖其繼不可與自功者一視文弨先世由餘姚遷杭

州故於此二志尤鄉邦文獻之所繫不敢不惓惓焉又  
梁國張湜有續志八卷今書後僅載其序而其書不可  
得見仍當訪求補錄以還舊觀此外郡之隸吾浙者尚  
有九考之於宋志嘉禾者有岳珂志吳興者有談鑰志  
四明者有羅璿志赤城者有陳耆卿志東陽者有洪遵  
志信安者有毛憲志新定者有錢可則志永寧者有陳  
謙志栝蒼者有樓璛其書或在或亡不可悉知儻或得  
見猶當傳錄之近代所脩皆詳於今而略於古則欲知  
古者於舊志易可少哉 乾隆三十九年歲在甲午冬  
至前一日書

醫書跋 戊戌

蠻書十卷唐安南經略使蔡襲從事樊綽所錄以上進者也凡管內山川道里以及詔贖等種族事迹風俗物產一一可考其書久失傳四庫館新從永樂大典中鈔出以行世乃得見焉嘗謂夷蠻爲患未有不由中國失撫馭之所致也綽以一從事而明日張膽敢歷舉前政之失以上聞可不謂忠於爲國者哉其言曰自大中八年安南都護擅罷林西原防冬戌卒以致洞主李由獨爲蠻所誘乘釁而起又言李象古李涿相繼誅剝令生靈受害又言數年之閒當州鎮釐革南詔入朝人數郵傳殘薄以致入寇本使蔡襲全家并元從悉殞賊所綽亦中箭攜印浮水渡江其長男韜及家屬皆陷蠻陬

之進此書也實望廟堂鑒前轍而籌長算焉實亦後世之所當奉爲著蔡者也此書多脫誤雖略爲是正而無別本可對意終歉焉然如閻羅鳳之世次則可以正新唐書之誤云 乾隆四十三年八月八日坐可怡亭書

書西藏見聞錄後

甲子

西藏古吐蕃地也唐宋迄明叛服不常獨向化於我朝最早百四五十年來恭順不普

列聖之所以攘其寇害卹其患災而休養生息之者雖在萬里若門庭然雍正閒憲準噶爾之擾使大臣良將鎮撫之峽江蕭君名騰麟以韜鈴成進士宦川北乾隆二年以副戎移駐其地之所謂槎木多者蓋西藏之門

戶也治軍暇爲詳紀其土地物產風俗之殊異爲二十  
門以括之名曰西藏見聞錄令嗣錫珀梓行於世頃以  
示余昔漢班勇威行西域而其所記諸國事迹范史卽  
本之以爲傳君之書其不然乎然余獨於書中見君澤  
及枯骨一事爲之慚然感肅然頌君之仁焉其俗人死  
剗剔之屑和之以食犬此猶必有財者方能使人爲之  
貧者則棄之溝壑君至募番人拾二十餘簏瘞之高阜  
以後月一行之在鎮五年所瘞不知其數始則土人相  
駁以爲異事君導以天性之愛聾以律法之嚴久之其  
人意惻惻亦若有動者迨君之去若失慈父母然於戲  
君不以異俗難化鄙其民而欲以王道漸移易之此其

運量爲何等也軍旅之治斥候之謹不足以盡君卽文  
墨之兼優者亦豈足以爲君譽哉嘗思人性不甚相遠  
而每囿於其習苟能動之以天良示之以禮教不必聖  
人而始化也在昔邇徼之地若交趾九真之在漢時固  
亦不知禮法自錫光任延爲之守而俗一變史以爲領  
南華風自二守始君以武臣能上體

聖天子仁覆罔外之德意引其孝慈惻隱之善性而陰  
消其驚害獵悍之萌此其識甚大而遠而綏輯底定之  
功乃在於無形也使當二守之任豈不能爲二守之所  
爲哉余故表而著之使來者知所慕焉

水道提綱跋

丙申

此書天台齊息園先生所著也先生名召南字次風乾  
隆元年中博學宏詞科入詞林

命課 諸皇子讀墜馬骨幾折以禮部侍郎致仕主浙  
江敷文書院講席最久以族匪連逮訊明釋歸未幾卒  
此書二十八卷先海而次及諸水於諸水先經流而次  
及支流之巨者至支中之支則附見焉自畿甸暨天下  
郡縣藩衛凡聲教之所通者罔不尋源訖委秩然具列  
兼以度之東西極之南北較其差數則尤爲易考也昔  
鄭漁仲謂志地理者必以山水爲主以郡縣可更而山  
水不易也然水之性容有不常者加以名稱古今各別  
非確然有證者固亦不能定其爲卽古之某水也是書

支分條析絲聯繩貫有證者實之無證者疑之人以爲先生第取各郡邑志而輯綴之然其中亦有正郡邑志之誤者則歷代之史與夫諸家地理之書罔不參考可知也至其兼天以言地則更出於漁仲所見之外矣第臺灣在閩海外而先生敘次稍不如粵東瓊郡之詳則亦似尚有當補者至於蒙古部落等名新有更定先生不及知之矣他如僧哭勒河當爲僧枯勒河哭路鄂模當爲庫路鄂模諧音取字宜有趨避不便襲用舊文至書中有番字當卽畧字之省文集韻有峽字又有駢字當卽站字之俗體畧字亦字書所無古但作奧而今吳越閩廣間或加山或加水見於名人著作者不一而足

故今亦不得而削之今人名傳置之處曰站亦非古訓  
然點字實未經見字更有或脫或譌以余所知者增正  
十餘處是書乘於其門下士浦江戴君兄弟殿海殿泗  
以其本貽余故得而卒讀焉若戴君者可謂不負其師  
者與

書徐霞客遊記後 丁酉

霞客遊記楊文定公有手鈔本余前在江陰其家以臨  
鈔副本畀余置之篋中不暇竟讀也今年徐之族孫筠  
峪鎮刻成十大冊各分上下又以貽余余老矣無能徧  
游宇內名山大川聊以此作臥游是不可以不讀霞客  
性好奇誠未免太過而能見重於黃石齋有某鄉官欲

與之相見知其魏闔黨也遲不往莫箚據歸順鎮安兩  
土司之地而慨當事之姑息貽忠又覩緬甸之強有深  
慮焉則其負性直介而又非全闢經世之務徒爲汗漫  
遊者比此記所遊歷直書卽目非有意藻繪爲文章也  
知言者亦正以其眞而許之然大約類形家者言爲多  
霞客之遊裏糧無多屢瀕於困而迄獲濟疑若神助其  
記巡按官一遊洞而居民受科斂之患費金二百山水  
之趣誠非高牙大纛者所可兼而有此又在位者所當  
聞而知戒也筠峪合諸本相讐校洵善矣而繡梓尙未  
盡工緻也卷之前元本閒有總敘其所歷以爲提綱者  
今刻本去之似少眉目難足山志中諸詩及石齋諸公

之詩凡鈔本所有者似亦非後人所當削也削之則仍  
非全書矣余故仍以楊氏所貽之鈔本爲善本云

城東雜錄跋

丁酉

吾杭人也旣冠卽客遊不能久居於杭親炙鄉前輩之  
餘論又無暇網羅遺文墜事以備一鄉之典故今忽忽  
老矣意殊慊焉此城東雜錄二卷乃厲樊榭徵君之所  
輯也徵君居東園在杭城之東故所錄亦因以爲斷吾  
祖居在東里坊其北則艮山門其東南則慶春門於東  
園最相近桑弢甫先生之居在焉先君子從幼往來里  
人有雙先生之稱後之人有續錄者亦可以爲東城重  
矣吾祖居卽所謂數閒草堂者也今吾弟居之而吾終

年旅羈宅猶未卜憶曩從弢甫先生客中讀杜詩至過  
客徑須愁出入居人不自解東西之句悅然卽東園風  
景也故鄉殊可念倘有惠我買山貲者吾其就東園以  
終老乎

書錄解題跋

丙申

直齋陳氏書錄解題二十二卷四庫館新從永樂大典  
中鈔出以行其持論甚正如顏氏家訓以其崇尚釋氏  
之故不列於儒家又以前志取樂府教坊琵琶羯鼓等  
書皆充樂類與聖經竝列爲非當入於子錄雜藝之前  
又言白玉蟾輩何可使及吾門其人殆棱棖嶽識見  
大有過人者不獨甄綜之富考訂之勤也陳氏名振孫

字伯玉湖之安吉縣人嘗倅莆田宰南城守嘉興台州  
端平中爲浙東提舉治會稽是書中一一可考見馬貴  
與既取其書以入通考而不用其言顏氏家訓仍列儒  
家樂府雜錄羯鼓錄仍列經部而目錄一門又不將陳  
氏此書載入其能免於紕漏之譏乎乾隆己卯余讀禮  
家居友人見示此書僅自楚辭別集以下而其他咸缺  
焉乃秀水朱氏曝書亭鈔本也今距曩時十八年而始  
見全書殊爲晚年之幸陳氏未嘗入館閣僅据其所見  
以爲是書故卷數或多或少不必盡合於國史又鼂氏  
讀書志有袁本衢本之異通考所載乃衢本而海寧陳  
氏所梓者乃袁本又通考有元至大闕本 本朝有武

英殿本兩者皆勝他本今校者似但据俗閒本也余客  
居鍾山幸以課讀餘閒少爲補綴幾自忘精力之不逮  
前矣

新訂書錄解題跋

戊戌

此書外閒無全本久矣四庫館新從永樂大典中鈔出  
分爲二十二卷余旣識其後矣丁酉王正復得此書予  
集數門元本於知不足齋主人所乃更取而細訂之知  
此書唯別集分三卷詩集分兩卷而其餘每類各自爲  
卷雖篇幅最少者亦不相爲聯屬余得據之定爲五十  
六卷元第詩集之後然後次以總集又章奏又歌詞而  
以文史終焉其他次第竝與館本無不同者其雜藝一

類校館本獨爲完善余遂稍加訂正而更鈔之余自己  
卯先見集部元本越十九年而更見子部中數門則安  
知將來不更有并得經史諸類者乎取以證吾所鈔者  
庶有以明吾之不妄爲紛更也已

弟子仁和王崇本復初校

抱經堂文集卷第九



抱經堂文集卷第十

東里  
盧文弨  
紹弓

跋

三

書荀子後

丙申

曩余於乾隆四年以事羈餘姚寓周巷景氏東白樓中  
抽架上有楊倞注荀子一書遂手鈔之爲巾箱本諸子  
自老莊外唯此爲得之最先也世之譏荀子者徒以其  
言性惡耳然其本意則欲人之矯不善而之乎善其教  
在禮其功在學性微而難知唯孟子爲能卽其端以溯  
其本原此與性道教合一之義無少異矣然而亦言忍  
性則固氣質之性也又曰性也有命焉君子不謂性也

則在孟子時固有執氣質以爲性者荀子不尊信子思孟子之說而但習聞夫世俗之言遂不能爲探本窮原之論然其少異於眾人者眾人以氣質爲性而欲遂之苟子則以氣質爲性而欲矯之耳且卽以氣質言亦不可專謂之惡善人忠信固質之美者聖人亦謂其不可不學學禮不徒爲矯僞之具明矣荀子知夫青與藍冰與水之相因也而不悟夫性與學之相成也抑何其明於此而暗於彼哉然其中多格言至論不可廢也余後得版本不甚精曾以他本校一過今年得影鈔大字宋本後有劉向校錄奏一篇并其篇目在未經楊氏改易之先最後兩行一題將仕郎守祕書省著作佐郎充御

史臺主簿臣王子韶同校一題朝奉郎尙書兵部員外郎知制誥上騎都尉賜紫金魚袋臣呂夏卿重校此當在宋英宗時奉勅校定者寫極工楷而譌錯亦復不少然以校俗閒本則此本字句尙未經改竄余亟取以正余本之誤蓋十有八九焉向嘗疑王深寧詩考引荀子與今本多不合至是始釋然知王氏所見之本卽此未經後人改竄之本也議兵篇有而順舉得勇力之屬句注雖依文爲解然相其文勢似不當爾江都汪容甫謂其上有脫文下有爲之化而願爲之化而公等語則此亦當是爲之化而順其上文則無由知之矣宋本分章處俱提行於大略篇獨否此則當倣前例爲之離絕者

也歲月如流迴憶三十八年前事若在夢境而白髮明  
燈手此一編摩挲探討不自意得見善本疑若有鬼神  
爲之賜抑何幸歟

書校本賈誼新書後

己亥

新書非賈生所自爲也乃習於賈生者萃其言以成此  
書耳猶夫管子晏子非管晏之所自爲然其規模節目  
之間要非無所本而能憑空撰造者篇中有懷王問於  
賈君之語證豈以賈君自稱也哉過秦論史遷全錄其  
文治安策見班固書者乃一篇此離而爲四五後人以  
此爲是賈生平日所草創豈其然歟脩政語稱引黃帝  
顓頊堯舜之辭非後人所能僞撰容經道德說等篇辭

義典雅魏晉人決不能爲吾故曰是習於賈生者萃而爲之其去賈生之世不大相遼絕可知也此乃漢魏叢書中本近借得前明兩刻本一是宏治乙丑吳郡沈頡刻本校者爲毛斧季又一刻本雖無沈頡名而其實卽是沈本爲之校者吳元恭也兩校皆據宋本是正今觀宋本科段字句有絕佳者而譌脫處亦致不少兩君一無持擇疎矣又有明正德年一刻本題爲賈子與宋本相出入有欽遠齟者合郴陽何燕泉本長沙本武陵本而爲之審定以去非從是其勤甚矣而義亦不能盡得其閒有爲後人出己意增竄者誦之頗似順口而實非也余殫旬日之勞合三本以校是書其不可讀者不及

十之一焉有所因則易見功也宋以前所增竄者疑亦不少此則不敢去恐其闕穢及米也捨宋本而從別本者著之意有疑者亦著之若專輒而改舊所傳則吾豈敢 乾隆四十有四年冬至前四日書

李軌注揚子法言跋

壬子

今俗間所傳五家音註法言本雖以李軌爲首而以法言每篇之序升之章首則依宋人宋咸所更易非復子雲之舊矣夫序在卷終史記漢書皆然李本獨未散亂可貴也文弨於乾隆乙巳借得江寧嚴侍讀道甫本乃李氏一家之注不爲俗本刪易因亟度於家書閱八年復假江都吳太史澄埜紹塗本覆校始能自信無誤矣

其書有何氏義門跋云絳雲樓舊藏李注揚子法言序  
篇在末卷未消本書次序後轉入泰興季氏又歸傳是  
樓康熙己亥心友弟偶獲見之讎校譌字寄至京師冬  
日呵凍自校此本他日餘兒苟能讀之乃不負二父殷  
勤訪求善本以貽後人之意也閱此跋乃知此書流傳  
本末余今年七十有六矣目眩神昏而復自力爲此亦  
不專望於子孫第使古人之遺編完善悉復其舊俾後  
之學者亦獲得見完書於余懷不大慨哉

書鶴山雅言後

丁酉

此宋稅與權吳甫記其師魏文靖之言也卷軸雖無多  
而釋經析理正文字考制度亦略備焉吳甫又錄文靖

與袁蒙齋書之語於篇端謂學人驚於高遠者則惟以  
直指徑造爲能溺於卑近者則又但以記誦辭章爲事  
必合內外貫精粗始可以言學觀此言可以知文靖一  
生爲學之大旨讀此書者亦可以推類而自求之矣余  
從吳門朱氏借得元至正年金天瑞梓本字極精楷而  
錯誤不免因以所知者略訂正而錄之版舊藏鶴山書  
院余嘗按試靖州過之想先生之遺風而求其書則舊  
版已亾惜乎當其時不能得是本而爲之翻梓以迪此  
邦之士也

荷亭辯論跋

乙未

往時見章楓山與東陽盧正夫書議其著論之失私亦

疑其用意過當或有未純近乃得荷亭辯論觀之始知其覃精研思實有灼見唯理之至是者爲歸不輕徇古人此乃其所以深信古人也百年前蕭山毛氏立論務與朱子駁幾於戟手裂眦相向微論其所言非也卽其氣象已迥與儒者不侔矣前輩山陰沈徵君冰壺清玉

尙沿其餘風余嘗微諫之徵君大笑而起朱子之視聖人固當不同謂其言一無可議是無所用其思者也因一二未安而遂并疑其餘夫豈可哉此書論經而兼及古今之事績往往多創獲讀之犁然有當焉間有與朱子異者夫非好爲異也反求之而實有所不愜云爾此書明史不載儒者亦鮮傳余從同邑宗人信波解元潮

生處鈔得之以爲如此書庶無嫌乎爲異且恐世人尊  
朱太甚一聞有異同便以爲必無可採則深昧作者之  
意矣余故欲諗夫好學深思之士而與之共讀焉毋使  
徒爲不知者詬病云

書學蔀通辨後

己巳

此書別朱陸之學之異較然明白學者熟觀之庶不爲  
曲說所誤夫人而欲爲陸氏之學亦第守陸氏之說可  
耳而必曰朱子亦若是何居蓋篁墩陽明諸人雖陸氏  
是宗然亦知朱子之不可攻也不可攻則莫若借以自  
助於以搖蕩天下之學朱子者使亦頰首以就吾之範  
圍而莫吾抗若曰子之師且不吾異子獨焉異之陸氏

之學之所以盛實由於此而朱子之學幾絕自此書出  
知二家之學必不可強同陸氏之學實出於禪蓋終其  
身弗變也而朱子則屢變而始定故有始同終異絕無  
始異終同觀其援據詳確爬抉底蘊而陸氏之爲禪也  
信然吾怪夫人之惑固有不可解者近時人又有爲陸  
子學譜及朱子晚年全論朱子不惑錄等書不過復襲  
程王之唾餘而少變其說以爲朱子晚年其學與陸氏  
合其論與陸氏異此語更齷齪不足辨顧反痛詆此書  
無知之人道聽塗說是誠何心哉

書鵠冠子後

庚辰

鵠冠子十九篇昌黎稱之柳州疑之學者多是柳蓋其

書本雜采諸家之文而成如五至之言則郭隗之告燕昭者也伍長里有司之制則管仲之告齊桓者也世兵篇又襲魯仲連遺燕將書中語謂其取賈誼鵬賦之文又奚疑近迭篇載龐子問聖人之道何先曰先人人道何先曰先兵噫此可謂知道乎彼所稱詖淫詐遁者亦  
孟子語殆不能自免矣

書陸農師解鶻冠子後

丙申

鶻冠子其人蓋生於末世而明於情事之變者也故其言曰以利爲情若不相與同惡則不能相親相與同惡則有相憎嗚呼何其辭之疇也又曰萬賤之直不能橈一貴之曲此言其勢不足以相勝也然嘗謂君子者亦

自行其志而已奚論小人之愛憎乎我哉帥可奪也志不可奪也以勢而言賤固不勝貴矣然理之至是者自常伸於天地間故曰斯民也三代之所以直道而行也如鶻冠子者蓋徒見其末而不循其本者也宋人黃東發斥其聖人貴夜行一語此又不可以辭害意也此卽中庸言不見不聞之意也若其所謂無欲之君不可與舉者乃大謬爾陸農師解是書能增成其是而不回護其非其於小學功夫深故往往有依字形立解處最爲釋書之善然泰鴻篇云物之始也湧湧至其有也錄錄俗本湧湧作傾傾陸便望文爲說云傾傾未正之貌不知泰鴻取元氣鴻蒙之義自當以湧湧或鴻鴻爲是陸

解非矣頃因江都汪容甫向余借觀是書遂順取翻閱一過而後郵之其字下注或作某者多卽其字之古文云

聚珍版本鶻冠子書後

丁酉

陸農師注鶻冠子余已爲說書其後矣今年鮑君以文以武英殿聚珍版本贈余余覆閱一過與余先所得本無甚異其博選篇云樂嗟苦咄則徒隸之人至矣樂嗟苦三字本缺校者謂據他本增入案陸注云樂則嗟之苦則咄之其語頗與正文相合然余向見宋人黃東發日鈔載此句則是謳籍譟咄不謂樂嗟苦咄也又王欽篇云家里用提注引公羊傳提月者僅逮此月晦日

也提今刻作提校語云提一本作提今本公羊傳亦無  
提月之文余按徐堅初學記晦日條下引公羊傳正作  
提月是陸氏所見尙與唐時本不異今本公羊乃作是  
月後人將反以提月爲誤矣又其罪有司而貳其家本  
注有其人爲首其家爲貳八字今本無之又參於兩閒  
四字本注在天子執一以居中央下而今以爲正文又  
天權篇注引列子亦微有更動不似元文至凡一本作  
某字云云者此非農師所加其中有絕無義理者大可  
刪去館閣新出書余力不能購今僅有此當寶而藏之

鬼谷子跋

甲寅

鬼谷子小人之書也凡其捭闔鉤緝之術祇可施於閭

君耳其意欲探厥意指之所向從而巧變其說以要結之使得親悅於我膠固而不可離千古姦邪之愚弄其主者莫不如是彼豈待教之而後知學之而後能哉其用術一一與此書闡合未必皆見此書也來鵠有云捭闔飛籀實今之常態不讀鬼谷子書者皆得自然符契也茲言信矣及觀其施於常人亦必在於昏邪庸怯之輩其言曰有守之人目不視非耳不聽邪言必詩書行不淫僻以道爲形以德爲容貌莊色溫不可象貌而得也如是隱情塞卻而去之觀此言是亦自知其術遇正人而窮也又其抵巇篇云世無可抵則深隱而待時此非遇明君治世所挾之術皆無所可用乎夫古大臣之

立朝也以道事君不可則止耳焉有務爲固結之術如此書所云者故曰此小人之書也或問曰如此則是書何以不毀曰凡夫姦邪之情狀畢見於斯爲人主者不可不反覆畱意焉庶幾遇若人也洞見其肺肝然彼欲以其術嘗我而我得以逆折之是助上知人之明也何可毀也吾甚惜其方寸之間神明之舍惟詭譎變詐之是務而終不免於窮亦何苦而爲此孟子云爲機變之巧者無所用恥焉正若人之謂矣且其術亦有至淺至陋而斷不能轉移人者如遭淫酒色者爲之術音樂之語之必將說之以靡靡之樂庶或動之靡靡之樂適足

以助其情欲耳其術不更疎乎是書余年家子江都秦太史敦夫恩復曾依道藏本繡梓爲校一過今年甲寅始見錢遵王手鈔本乃知藏本之譌脫不可勝計內捷篇內至脫去正文注文其四百十有二字余亟借以補正之噫若使無此本不卽以藏本爲善本哉校旣竟因爲書其後

書韓非子後

丁酉

商韓之術用之使秦強不知正乃所以速其亾也今當聖道大明之日其說之謬夫人而知之固不待於禁絕若非之辭辨鋒銳瀾翻不窮人以其故尤愛之非之於說固其所專攻也如內儲外儲等篇猶今經生家所謂

策目預儲以答主司之間者耳是本爲明趙文毅校刊  
本遠出他本之上余向借之北平黃崑圃先生後先生  
以歸余乾隆丙子以凌瀛初本校一過閱二十一年丁  
酉借得馮已蒼所校張鼎文本乃以葉林宗道藏本秦  
季公又元齋本并趙本合校者因覆取參對改正甚多  
張刻本固不佳然其晦滯驟難曉處轉恐似本文趙本  
凌本乃文從字順安知非後人不得其解而以意更定  
者乎注傳爲李贊作不能盡知本意稍涉奧僻便置不  
說頃讀八說篇有云升降周旋不逮日中奏百趙氏疑  
當如左氏所云距躍三百曲踊三百之百解余以荀子  
議兵云魏氏之武卒衣三屬之甲操十二石之弩負服

矢五十个置戈其上冠軸帶劒羸三日之糧日中而趨百里以解此方合馮氏於崇禎戊寅一年中閱此書四過余隔廿一年乃再閱遠不逮矣

書呂氏春秋後

庚辰

呂氏春秋一書大約宗墨氏之學而緣飾以儒術其重已貴生節喪安死尊師下賢皆墨道也然君子猶有取焉秦之君臣曷嘗能行哉獨墨子非樂而此書不然要由成之者非一人其近墨者多也漢志謂墨家者流蓋出於清廟之守清廟明堂也此書十二月紀非所謂順四時而行者歟則漢志之言信也孟子尊孔子斥楊墨書中無一言及之所稱引者莊惠公孫龍子華子諸人

耳世儒以不韋故幾欲棄絕此書然書於不韋固無與  
也以秦皇之嚴秦丞相之勢燄而其爲書時寓規諷之  
旨求其一言近於揣合而無有此則風俗人心之古可  
以明示天下後世而不怍者也世儒不察猥欲并棄之  
此與耳食何異哉

書子華子後

丙申

舊相傳以爲晉人程本所爲書名程子後更題爲子華  
子凡十篇謂其人卽孔子傾蓋與語終日者也劉子政  
校其書而悲其不遇宋人黃東發乃謂是豈有遇世之  
正學哉余謂黃氏於其書蓋未嘗觀其深也故其所取  
者特辨黃帝無鼎成上升之事耳此則應仲遠王仲任

輩皆能知之而辨之何足以重子華子余獨取有道之世因而不爲責而不詔二語非深知治天下之大體者焉能作斯語哉因而不爲故在上無妄作之患責而不詔故在下無阿意之弊所欲與眾之所惡與去之因而不爲也罔攸兼於庶言庶獄庶慎惟有司之牧夫責而不詔也君相之大道備於斯矣是人也爲政其庶幾成王道也歟劉向悲其不遇是也而黃氏謂其不然其所見之淺深固不同哉若其文辭之蔚然可觀抑末也是書無他本可校余以意定正數字且疑最後二章類六朝人所傳蓋之者後有讀者其審諸

崔豹古今注書後

辛未

伏侯古今注見於史漢注中今其書已逸惟晉崔正熊

書傳爾首輿服次都邑次音樂次鳥獸次魚蟲次草木

次雜注次問答釋義凡八篇舊止一卷今本乃三卷其

輿服篇可與司馬紹統之續志相參考也

輿服志云乘輿黃赤綵纁淳黃圭長丈九尺五寸五百首崔書作長

采黃赤綵纁淳黃圭長丈九尺五寸五百首崔書作長二丈九尺九寸案下諸侯王二丈一尺則天子不僅長丈餘可知又綵者加特也崔書作特加也皆可以正續志之誤云

此書卷帙甚約而脫

誤頗多後又有一書名中華古今注太學博士馬縞所集其序云昔崔豹古今注博識雖廣迨有闕文洎乎廣初莫之聞見今添其注以釋其義目之爲中華古今注勒成三卷稍資後學請蓋前言云爾縞蓋唐時人觀其所增不過數事而其書之脫誤殆有甚焉其次第亦普

更易又獨不載崔書草木一篇未審何意又如乘輿卽天子之稱而稿以爲天子乘輿之制其所添注若魯陽揮戈烏鵲成橋之類皆非制度所繫又若改伍伯爲部伍分莎雞促織爲二條唱上乃行節而誤以唱爲句其書疎謬如此不足別行然崔書之脫誤則藉以取正焉且擇其續補者若干條別爲一編繫於此書之後其序所云廣初疑唐初之譌也 乾隆十六年五月九日識

玉照新志跋

丁未

宋王仲言明清所著揮麈前後錄及第三錄餘話向俱鈔得之唯玉照新志未見善本今春過蘇州詣吳秀才枚士案頤適有此書乃秦西巖四聲鈔之吳方山岫者

凡五卷其分卷與明人祕笈中本六卷者不同非缺逸也前後亦有互易字句大有異同秦之外孫孫岷自江復以元人錄本對校之於是此書脫誤得補正十之七八矣余因假之至金陵清寫一本以與揮塵等錄同藏藏之向於詩話中見洪芻投竄海外而不悉其罪狀乃今於此書見之罪蓋不容於死者而僅從流徙當時之寬政如是然陳東歐陽澈與岳武穆翻不得其死何哉仲言又有投轄錄余尙未之見云 乾隆五十有二年

三月六日書

書東坡志林後

戊戌

此書本謂之東坡手簡或謂之手澤而今所題者乃皆

謂之志林此五卷單行者事各從其類頗便檢閱與全集中所載無小異也稗海本則有十二卷視此更多而不分類其次序先後不同論古一卷獨無之是皆從墨跡中掇拾而成者雖判語間亦入焉以此知手簡之名之所由來也此皆安石碎金若論古則煌煌乎大文廟此殊不類余兩本皆爲正其誤字而以稗海本爲較善云 乾隆四十三年十月旣望後三日書

湛淵靜語跋

己亥

始余見白廷玉是書紙墨已剥敝文字脫爛致多斷續重是鄉前輩著作鈔而藏之篋中越三年從鮑君所借得一本書皆全唯序尚有闕文更一年復從鮑君所見

一本并序文亦完好喜而錄之遂成善本何義門取其辨饒雙峰論洪範五行一條謂能獨抒所得余則取其言士當愛名謂人苟不愛其名則悖逆很暴之事欲爲卽爲矣欲爲卽爲雖嚴刑重戮有所不禁故春秋一書正爲名教使後之人恥惡名慕令名以相勸勉也其言如此有味哉余謂人之惡夫名者謂爲一事而以善自與必將以不善歸諸人故好名爲舉世所共嫉自非然也則名之在我猶影之與形實至則名歸猶形端則影正也使惡影之正彰於外也而故毀容易行以求免可乎哉夫子疾沒世而名不稱易傳謂善不積不足以成名記言欲爲善思貽父母令名孝經言立身行道揚名

於後世屈子恐脩名之不立古人曷嘗不重名也無實  
之名名不可好從實之名名不可不愛立身一敗萬事  
瓦裂惡名歸之有欲蓋而不得者若快然自便其苟賤  
不廉之行而猶謂吾求免於好名之議是致人之鄙我  
賤我怒我辱我而曰吾甚畏夫人之愛我敬我也此豈  
可以欺童孺哉行已有恥恥則有所不爲此卽謂君子  
之愛其名也可吾安得起延玉而一正之 乾隆己亥  
十有一月十日坐北樓書

書真詰後

戊戌

脩練服食之事吾不能爲也家有此書聊復寓目其書  
事與史傳相涉者頗差互不可攷然吾於其中得要藥

焉其曰念不妄多則正散正散而求不病猶開門以  
捍猛敵此在吾尤爲對證之方也志權勢營財利侈觀  
美極耆欲吾早已淡然不嬰於懷已終日所營營者惟  
在手書策之間壯年矢志欲取十三經諸史而全校之  
奪於人事至今未畢而年已耆矣又經史外每見一書  
輒披閱盡卷乃已常有顧此失彼之懼卽一書中牽引  
眾書甚多是以千條萬緒紛綸交錯事有遺忘每費尋  
檢近來多病常爲風寒所乘未必不由此也雖然世短  
意常多眾人皆有此病其爲凶羊均也吾寧讀吾書終  
不願爲頑仙矣 乾隆四十三年十月二十七日書

弟子江寧管鵬飛程萬校

抱經堂文集卷第十

抱經堂文集

卷十

三

抱經堂文集卷第十一

東里 盧文弨 紹弓

跋

四

書北夢瑣言後

戊戌

富春孫光憲爲荆南高氏從事著此書凡二十卷紀唐及五代近事自云博訪於人未敢孤信三復參校然始濡毫所紀疑皆實矣然如鄭畋崔雍之事皆不與正史符會前後複見處亦時有參差所謂耳聞不如目見雖未掩瑕要不當因而集矢也其中可喜可愕之事甚多敘次袞袞亦由藻飾之工在稗官中固自成一家言雅雨盧氏得葉石君鈔本刻之叢書中以爲優於前明商

氏稗海中本余今始取商氏本相比對乃知商本亦大有佳者其不知當時語意而妄改者間有之卽盧本亦不免也顧余十數年前偶繙太平廣記取以正此之脫誤更有出於兩本之外者倘有少年憲事者從而畢功更大妙也然就余所校已賢於舊本遠甚前罷官在京師日偶爲込兒衷是舉唐人鉏禾日當午一詩以爲聶夷中作兒憚余不敢請退而詢北堂宏農君曰昔聞是李公垂作人以此卜其必相者得毋誤也余聞亦啞然不自憶前語之由來今觀此書實然余向者亦沿興公致誤也玉樹長埋瑤琴復絕不能竝起而告之掩卷之下益不勝其腹之悲已

侯鯤錄跋

辛丑

前題聊復翁德麟則著書之人也德麟者宋宗室名令  
時太祖子燕懿王德昭之五世孫也黃魯直爲宮教德  
麟受業焉與蘇子瞻同官潁州故其所交多一時名士  
後從高宗南渡襲封安定郡王紹興四年薨貧至無以  
爲殮宋史有其傳此書分上下兩卷而明商氏梓於稗  
海中者則爲八卷與趙希弁讀書附志所載卷數合蓋  
在當時外間或有二本傳者不同而以之相校則此本  
爲勝商本第五一卷全載王性之辨會真記事而演其  
事爲鼓子詞十二章全類俳優此書不載蓋本不當載  
也餘商本有而此本無者僅五條錄附於後商本譌舛

甚多而舊鈔本亦復不免雖屢經校勘仍有一二脫誤  
不能強補者姑闕之然已大異乎舊所傳鈔本矣其商  
本余亦爲補正云

書塵史後

丁酉

此書宋安陸王得臣彥輔之所著也僅三卷記其本朝  
君臣事跡頗可以資考鏡彥輔初受學於鄭介夫又嘗  
執經於胡翼之其師友多賢者故此書在宋人說部中  
爲最醇特其首記藝祖朝有聲登聞鼓求亾豬者此則  
出於流傳之言欲以見當時天下無冤民而不知非事  
理所宜有不記可也其言人之仕宦爲貧者多往往以  
所入之厚薄分美惡所相告語者輒以此噫宋當神哲

朝其風氣已如此乎余從人假得虞山毛黼季校本自  
言得三本參校而以何元朗所藏爲最善黼季校此書  
時爲康熙辛卯年七十有五矣彥輔自序此書在宋之  
政和乙未年八十而余之校錄此書計年正值始生之  
歲是爲

今上皇帝乾隆四十二年丁酉也余方悼衰年已屆而  
於諸子百家之書猶廣愛兼嗜不能輕有割捨乃昔之  
著是書與後之校是書者其年皆過於余一星已上余  
用此自慰不復以空擲日力爲嗜矣此書有作四卷者  
雖篇葉稍均然非其本來也故今所鈔仍依三卷之舊

書石林燕語後

戊戌

此書有正德元年河南清軍御史楊宗文武所繡梓者  
余取以校碑海之本凡所缺且譌者皆相若也石林釋  
褐紹聖時有列於朝宣和五年致仕卜居湖州弁山之  
石林谷此所以爲號也而說者乃謂出自天問見陳振  
孫書錄題解夫焉有石林何獸能言之語雖至愚者不取以自寓  
而謂葉氏乃本諸此誠似不足繩然吾嘗推其所以致  
人之言者抑有由也其自序此書云孔子於虞仲夷逸  
曰隱居放言而公明賈論公叔文子曰夫子時然後言  
人不厭其言子曰然夫言不言吾何敢議抑謂初無意  
於言而言則雖未免有言以余爲未嘗有言也可夫以

孔子爲然公明賈之辭此猶爲讀書鹵莽之失若其自謂有言一如無言則儼然位已於時中之聖而忘其分量之所稱矣且其生平以黨姦斥正爲君子所不許故當世因其所自號又卽其序之言而用以爲譏不然人之號多矣不皆原其所自而僅見於石林又獨迷謬其辭以斯知有爲爲之也陳振孫亦湖人寧不知其鄉之有石林谷者又其自序陳亦必無不一寓目之理乃舍而從天問其微意可思也其書言國家朝章典故搢紳人物爲詳而汪玉山韓仲止之徒亦復指摘其誤然猶愈於草澤之傳聞矣據其自序所云則尙有滑稽諧謔之辭於今殊不一二見豈其子姓刪之歟謂東坡晚又

號老泉以眉山先塋有老翁泉故名此則世人所未悉知者其言天下印書以杭州爲上此在今日猶然余於稗海中本補其目錄文有遺脫具註各條之下中有複重者不加削云 乾隆著雍闔茂之歲孟冬二十有五日書

書泊宅編後 丁酉

此宋方勺仁聲之所著也本浦江人嘗奉親居杭之清波門外又嘗居烏程之泊宅村村以唐元眞子泊舟之所成名木亦婺人也仁聲慕同里之高躅故因以名其書其父方資嘉祐八年進士第由縣令擢鄧州教授歸老於杭以卒今通志謂其知深州者誤也書十卷而稗

句

海本止三卷雖非全書然亦有數條出於十卷之外者其間亦間有異同余意欲會而爲一顧卒卒無暇以爲友人江陰趙君敬夫乃欣然任其事交左易右移後從前據案疾鈔腕告乏而意猶不止未浹日而已竣遂完然無復有一之遺漏者矣余因其成書稍加櫽栝復令人錄出如右金華志言其詩文雄深雅健追古作者此書自言元祐中應杭試有訟其戶貫不明者適蘇文忠爲帥送之獲薦遂得從公游則其文章必不枉四君子後而今皆不傳僅此區區者猶不至盡爲灰燼然則士之欲修飾其辭以冀後有一日之名者其果足恃也歟哉趙君今年七十三余六十一實不知後之人位置

余二人於何所而惟是遺編陳籍紙墨之未卽渝敝者必有人見之而憐余二人華髮盈顛猶勤勤役十指不少輟庶幾一生耽嗜之志尙有所託以自見歟此書所載治病方試之頗驗尤有益於世云

游宦紀聞跋

己亥

此書商氏稗海中有刻本其第四卷中有顛錯他卷亦有脫文余得一舊鈔本考正乃始完善其言字書無褪字又韻中不載尖字蓋褪古但作退尖古但作牋也然廣韻自有尖字光叔未細檢耳又言餽頭當用糧字見東晉餅賦今考東賦中自作曼字卽字書中亦不見有糧字也又言正月因避始皇諱故讀正爲征此則未確

如尙書音常星宿音秀自是當時所呼如是豈亦有諱  
邪且政本字尙不改音而獨改正月一音不可通矣書  
中使君作史君此本可通用見於碑刻非誤也卽李發  
先跋此書稱雲臺史君者乃光叔之父非謂史姓其人  
書中有以啟于闕語于闕猶求官也商刻乃改于闕作  
千冊古書之流傳者往往爲不學之人所竄改其可笑  
多類此如不見舊本又惡從而盡正之耶因有刻本而  
遂廢鈔本此大不可 乾隆己亥十一月三日坐西軒

書

輟耕錄跋

丙申

南村在元時未嘗出仕而多知國朝之典故輯史乘者

資焉至其援引證辨頗有益於學者下及細瑣諸謬之事亦可以廣見間釋疑滯未至有傷雅道也孫大雅序謂其拾樹葉而書之夫樹葉非竹簡羊革比也其能容百名以上乎殆同戲論郎仁寶譏其勦廣客談以爲已說此自秦漢以來諸子之書已有互相出入者卽郎氏七脩類藁中不亦有間取是書者乎然著書家誠能自抒新得不襲陳編更足貴也此書舊刻難得今所行多脫去數葉而書賈因併其目亦刊除之後此益無由覩完書矣余所收亦近時坊本訪諸藏書家始得鈔錄以補其闕閼者尙珍惜之

書七脩類藁後

丙申

此書初刻於閩中仁寶題目錄後云書者非人漏誤甚  
多貧賤未能更也近年吾鄉有周君俊倫者取而重雕  
之於舊本之誤多所刊正且蓋以續藁七卷但卷之三  
十五四十九皆有脫葉訪之郎氏子孫亦無善本可校  
補者矣仁寶讀書好古勤於纂輯而虛懷樂善甚望友  
朋之益題諸座間以求規正其志不可謂不誠矣而一  
時相與游從之人曾未有爲之商榷而持擇之者使當  
日有人焉爲之約其精華刪其牴駁資其考鏡糾其舛  
譌卽卷軸不必如是之多而要可與賓退揮塵輟耕諸  
錄頡頏矣讀是書者能不慨然於直諒多聞之難遇哉  
周君乃庚戌狀元兩甘先生之孫能表章前哲刻成而

以詒余余於鄉前輩之著述皆愛之重之是書多述吾  
杭事尤不敢不留意刪訂之說在成書之時則可在後  
人又難以輕議爲也讎校既訖爰書數語於後并以復  
於周君庶不虛其雅意云

書韓門綴學後

戊戌

韓門綴學五卷續編一卷錢塘汪抒懷先生撰先生名  
師韓韓門其別號也雍正十一年進士入翰林教授  
皇子

賜居圓明園側離家人所居僅一舍不能治其私其內  
子怒支婆而聽其居外御史以爲言遂罷官後主保定  
之蓮池書院最久晚歸里未幾卒此書彷彿顧氏日知

錄之體例先經次史以及古今事始與雜辭證徵引詳  
洽而攷訂精覈爲近代說部之佳者其引呂汲公之言  
謂白香山詩所云退之服硫黃一病訖不痊乃衛中立  
其字與昌黎同耳又引唐語林言文公病將卒召羣僚  
曰吾不藥今將病死矣汝詳視吾手足肢體無証人云  
此尤可爲確證一洗孔毅夫雜說陳后山詩話之誣而  
絳桃柳枝之名謂皆出於傅會其論甚快此外又有談  
書錄一卷詩學纂聞一卷談書錄與韓門綴學皆可入  
雜家纂聞卽詩話也當入文史類錄中自言命纏畢月  
以水爲命而水在箕度推命者多引韓蘇爲說又言歐  
陽公耳白於面名聞天下脣不貼齒無事得謗明道雜

志又謂其鬚不掩齒今有人焉耳則白矣又無脣不貼  
鬚不掩之患而乃謗罵多出意外云云此則先生自寄  
其身世之慨矣丙寅丁卯間余與友朋會文京邸呈先  
生蒙賞識丙戌提學湖南見先生於保陽錄所咏長沙  
古跡詩示余余所履實繼先生之後塵云先生人品無  
可疵議徒以家人詬諱爲累而一斥不復是可惜也

乾隆四十三年十月二十七日里後生盧某書

書楊武屏先生雜諍後

庚辰

人之爲學也其徑途各有所從入爲理學者宗程朱爲  
經學者師賈孔爲博綜之學者希踪貴與伯厚爲詞章  
之學者方軌子雲相如爲鈔撮之學者則漁獵乎初學

記藝文類聚諸編爲校勘之學者則規撫乎刊誤考異  
諸作人之力固有所不能兼抑亦關乎性情審其近而  
從事焉將終身以之而後可以發名成業其能有所兼  
者尤足貴也余年十五六從人借書讀卽鈔之久之患  
諸書文字多謬誤頗有志於校勘然顏介不云乎必劉  
向揚雄方稱斯任深愧見聞不廣逡巡不敢爲至三十  
外見近所刊經史其改正從前之誤固大有功矣而用  
意太過則不能無穿鑿之失校者不一其人則不能無  
差互之病於是始因其考證而續成之漸旁及乎諸子  
百家今余家所藏者太半經余手校者也

本朝顧亭林閻百詩何義門諸先生皆善讀書余竊慕

之江陰楊生象坤琮出其叔父武屏先生遺書示余乃知先生在日極好鈔書又善讎校有雜諍一編皆駁正舊文之誤者積塵宿穢霍然一清讀之忘倦先生爲文定公從弟名名寧治縣有名古文有晉人風致閒有似漆園者詩工於言情此又其才之兼焉者已集中有寄文定公書乃知校刻經史由文定公之請而其議則自先生發之惜乎不得置先生於館閣校勘之列以其成其事故書雖成尙不能無遺憾使先生及見之所當糾正者復不少矣楊生知寶貴先生之書凡零章斷簡亦必手鈔而部次之其好學亦有足多者并附著之

再書雜諍後乙未

此書通作一編余釐之爲八卷重鈔之計前著跋語時  
隔十有六年矣歲在己丑余續昏先生之女孫其季也  
來爲余繼室甚好文事若男也必能收輯先生之遺書  
歸余僅四年而亾此書久在篋中慮或有損蝕重傷亾  
者意爲稍稍整理之乃今可傳諸學者先生過目成誦  
而識又高故能薈粹同異而處決其是非不少違爽凡  
所援引左證不資檢閱聞先生雜著總名碎錄此雜諍  
者特碎錄之一類耳余甚願得其全著述而傳之楊氏  
多佳子弟其名琮者字象坤有志掇拾墜簡而以飢驅  
客於外文定公冢孫曰伯庸敦裕好考核之學不幸前  
一年死矣今其弟仲威敦厚亦能繼斯志余將就而謀

之當必不虛所望也

先生於經之注疏正史雜史諸子說部古今詩文咸  
摘錄手鈔細字廿餘厚冊余曾借觀此楊氏所當寶  
守者今歸之仲威有增訂亭林日知錄妻舅彥和騷  
以詒余今藏於余家

山齋客譚跋

丁酉

余今年在杭州求景先生之文集不可得獨得其所爲  
山齋客譚八卷者於倪君嘉樹所雖小說家流然其中  
多有可資以警誡者非但以志傀異雜嘲弄而已也第  
五卷記瓜山土神祠引先祖書蒼府君之言謂視碑所  
載神爲漢之禰正平蓋吾杭土神往往皆漢唐以來著

稱者卽如余家世居東里坊而土神乃漢之蕭鄧侯相承已久莫考其所自來類如斯矣吾先世遺有祀田在瓜山故吾祖時往來其地得見廟中之碑而邑志不載今碑之在亾亦不可考後之人當以吾祖之言爲據焉因是以推先生文集中必有與吾祖論議酬贈之作爲後人所當知者而竟無從得能無喟然而增慨乎鈔此書竟漫識數言於末

書鄭莊眭先生傳記後

辛丑

人固有死而不亾者然子雲之書亦必待後世復有子雲而後重苟其臭味不相入則政所謂羊叔子自佳耳何與人事烏在其能曠世相感哉歸安丁孝廉小疋其

嗜學也若飢渴之於飲食研析異同訂正譌誤於古人  
未嘗輕徇顧於其鄉前輩鄭芷畦先生惓然有餘慕焉  
爲搜集其遺聞墜事及當時諸老宿相與往還酬贈之  
作寃成一巨編自名公爲之傳記以發揚之其勤懇之  
意幾如子孫之欲表章其父祖者然此何以故母亦行  
誼學術之相孚有不期然而然者歟先生名元慶字子  
餘以諸生貢太學生平著書甚富其最著者禮記集說  
參同八十卷行水金鑑百七十五卷湖錄百二十卷石  
柱記箋釋五卷今湖州府志實本之先生所居號小谷  
日晚年客遊山左卒於雍正年間兩子早亾故其詳不  
可得聞然取重於毛西河朱竹垞張匠門李穆堂諸公

今見於各家集中者咸班班可考歿後又有全謝山

祖

望翁覃溪

方納

盛柚堂

百二

爲之志若傳稱道弗衰夫

以一諸生而能致此此豈可幸得者乃丁君猶以其門  
戶凋零遺文散失恐後來者至不能舉其姓字引以爲  
大憾故亟亟求表章之唯恐其不至將所謂後世之子  
雲丁君居之無愧色哉然以示俗閒人必大笑爲迂緩  
不急之務殊不知古作者之精神命脈其代相嬗於千  
百世而未已者如磁之引鍼琥珀之拾芥蓋實有不知  
其然而然者余雖不文感丁君之意因題數語於卷後  
而歸之非敢自以爲能發揚先生之盛美也

書楊恭士撰先外祖墓表後

壬子

先外祖撫畢氏姨之兩孤女爲己女長歸太學生孫青嶼名岱曾十才子中宇台先生其祖也次歸舉人山東樂陵縣知縣楊恭士名儕此基表後所以自稱爲子婿也古文亦名家無後文多散失文弨會見其集已梓者數篇而已先外

祖集中有畢節婦邵氏傳節婦二十五而寡守節十四年而卒故外祖母視其女猶己女翼其長而嫁之親生女祇先母一人生之日先外祖有詩見樊中集余恐有昌黎兩壻之嫌故具著之外孫盧文弨謹識

題劉烈母詩卷後

丙子

此寧鄉孝廉劉君有洪所得於四方士大夫之詩以表章其曾大母胡氏死烈之行者也母之夫曰肇之家於

南塘去縣遠因徵發數復營室於邑城之東時往來居焉明已亾流賊張獻忠餘黨尙轉掠湖湘閒肇之先歸南塘聞警遣人之城東迎妻子母與其二歲兒行中途賊已至亟以兒授僕曰此劉氏一脈汝速負之逸吾必不免異日收吾骨於此賊退肇之跡其處至所謂花橋者得其尸徧體刃傷而猶不壞遂收葬焉其後再娶皆無子而母所遺之二歲兒遂成立有後今曾元輩甚繁衍云向使母當危急時稍一濡忍愛其兒不能去諸其懷以冀幸賊之不至賊至矣卽能奮然不顧慷慨誓死其自爲如此亦可無憾然此懷中弱息亦必不免於凶人之鋒而因與之俱殲焉則劉氏之鬼其不爲若敖氏

也者幾希今母之節既皦然若此吾尤難其見義明而審幾決身死而劉氏賴以延以視夫提攜牽率相與入井蹈火而死者不更爲處變之盡善者乎若夫不忍其子以致不能自完其節不能自完其節而井不能自完其子此皆可無論矣以是知母之所爲尤難能也余與孝廉友善其爲人端且厚故能盡揚其先人之烈於士大夫之口母德之流衍其正未有艾已

弟子江陰湯裕岵瞻校

抱經堂文集卷第十一